

ԱՌԱՋԱԲԱՆ

Հայաստանի ժողովրդագրական և առողջության հարցերի հետազոտության (ՀԺԱՀ) վերջնական զեկույցը ՀՀ Ազգային վիճակագրական ծառայության ժողովրդագրական և առողջության հարցերի վերաբերյալ առաջին բազմակողմանի և մանրամասն հրատարակությունն է: Վերջնական զեկույցն արտացոլում է բնակչության վերարտադրողական առողջության առաջնային ցուցանիշները:

Սույն զեկույցը պատրաստվել է ՀՀ առողջապահության նախարարության հետ համատեղ՝ ORC Macro-ի փորձագետների օժանդակությամբ և ԱՄՆ Միջազգային զարգացման գործակալության ֆինանսավորմամբ: ՀԺԱՀ-ն բարեհաջող ընթացքը հնարավոր եղավ ի շնորհիվ վերոնշյալ կազմակերպությունների համատեղ ջանքերի: Առաջին հերթին, դա ԱՄՆ-ի Միջազգային զարգացման գործակալությունն է, որը ֆինանսական միջոցներ է տրամադրել հետազոտության համար: ORC Macro-ի փորձագետները տեխնիկական օժանդակություն են ցուցաբերել հետազոտության ամբողջ ընթացքում: Նրանց շնորհիվ հետազոտության իրականացումն ու սույն զեկույցի հրատարակումը տեղի ունեցան շատ կարճ ժամկետում: Անհրաժեշտ է նաև նշել դաշտային աշխատանքներում ընդգրկված աշխատակազմը, որոնց բարեխիղճ աշխատանքի շնորհիվ հավաքագրվեցին որակյալ տվյալներ:

Սույն զեկույցում զետեղված են Հայաստանում պտղաբերության, մանկամահացության, արհեստական վիժումների, հակաբեղմնավորման մեթոդների օգտագործման, նախածննդյան և հետծննդյան բուժօգնության տրամադրման, մոր և մանկան սնուցման կարգավիճակի և սակավարյունության վերաբերյալ վիճակագրական տվյալներ: Շատ ցուցանիշներ բերված են նաև յուրաքանչյուր մարզի կտրվածքով: Այս տվյալները հաշվարկված են համաձայն ժամանակակից վիճակագրական մեթոդաբանության սկզբունքների՝ հնարավոր դարձնելով միջազգային համադրումները:

ՀԺԱՀ-ն վերջնական զեկույցի նպատակն է տեղեկատվություն տրամադրել և՛ մասնագետներին, և՛ հասարակայնության լայն շրջանակին, ներառյալ առողջապահական և գիտահետազոտական կազմակերպությունները, պետական և տեղական ինքնակառավարման մարմինները, ոչ պետական և միջազգային կազմակերպությունները, զանգվածային լրատվամիջոցները և այլոք, ովքեր Հայաստանի բնակչության առողջական վիճակի վերաբերյալ մանրամասն վիճակագրական տեղեկատվության կարիք ունեն:

Ս. Մնացականյան

ՀՀ վիճակագրության պետական խորհրդի նախագահ

ՀՀ Ազգային վիճակագրական ծառայության նախագահ